

Durante anochi di informacion na Centro di Bario Playa Pabao Ing. Marlon Croes a duna splicacion amplio relaciona cu construcccion di e siguiente fase di Watty Vos Boulevard



ORANJESTAD(AAN): Gabinete Mike II a cuminsa prepara un serie di evento cu lo mester conduci na destaho publico di e proyecto Ringweg 3, cual ta bay worde ehecuta segun e formula PPP (Private Public Partnership).

Prome cu e proyecto por yega na e fase di destaho, mester organiza un serie di evento manera e anochi di informacion cu habitantenan, pero tambe un "Industrial Day" pa companianan di e sector interesa den e proyecto. Tur esaki a worde splica door di ing. Marlon Croes, director interino di DOW.

Door di algun trabao cu a worde haci caba na final di Gabinete Mike Eman I, por bisa cu awor ta cla cu e fase di preparacion di Ringweg 3, conoci como Watty Vos Boulevard. Den e parti di e preparacion a traha loke ta e "scope" (con nan kier mir'e) di e proyecto.

Pero prome cu e proyecto por bay destaho publico, Gobierno kier haya participacion di comunidad di Aruba, cu nan pensamento y sugerencianan.

Basa riba e sugerencia "nos lo bay ta modificando nos documento durante e dialogo pa haci e producto final uno mas miho", Ing. Croes a comenta despues di e prome presentacion diaranson anochi na Centro di Bario Playa Pabao.

Tur e aspectonan aki na final ta worde hinca den un "Survey environmental assessment impact report". Un

di e condicionnan cu mester cumpli cun'e ora di traha e rapport aki, ta cu mester a informa ciudadanonan mas miho cu ta posibel. "Esaki tabata e prome anochi di informacion y lo bay tin dos mas," ing. Croes a señala. E anochinan aki ta principalmente pa e habitantenan unda e Ringweg 3 ta pasa.

Den e proyecto aki ta bay construi 13 rotonde, y e

motibo cu a scoge pa turbo rotonde ta, segun Croes, e ta mas factibel financieramente y por handle e trafico tambe. "E ta brinda siguridad, bon fluho, barata y embecece e crusadanan tambe". Sr. Marlon Croes e anochi a haya chens tambe pa kita algun inkietudnan cu tabatin, principalmente riba aspectonan di siguridad.